

أنا عندي ميعاد مع بكرة
بس انا في السجن ياعم
انا نفسي أشوفك بكرة
ف لو حتى تجيني ف حلم
و ادي بكرة مايجيش بكرة
والقلب بيثلب دم !
مايين القهوة والدخان
مايين الفرشة والقضبان
مايين السجن والسجان
مايين التوهة والفوقان
بستنظر . .

وسور السجن ماعرفناش
ولا شافش البشر فينا !
ولا يفهمش غير ان البشر سُجنا
نمر ميري

تملي وقوفها طوابيري
حياتها وموتها طوابيري
ياشعب بيتولد ويموت
بيستنظر . .

ياحرية !!
ياأجل بنت في الدنيا
وأصعب بنت في الدنيا
أمانة عليكي تديني لبكرة ميعاد
ولو ثانية . .

وتديني خطاوي جداد
وقلب حديد مبملش
وناس بتحب ماتخافش
ووعد جديد مهوش متعاد
ليالي تمر ياسمرا . .
- ولو عارفة -

في هذا السجن بتعدي
الليالي شداد
وقلبي بينجرف في السيل
وروحي بتتر عش وتميل
و اتاري الصبر مش كافي
ولا شافي
ولا هو جميل . .

وانا غايب
وانا وانتى .. شبعنا غياب
ف هذا الفجر مش صادق
وهذا الليل مهوش كداب
واه ياسجن من برة
واه يا آهه مش حرة
واه ياسجن جوايا
حيطانه عنيدة مالهاش باب
آهين يافرة الأحباب
ونستنظر ..
برغم بشاعة المنظر
ورغم ان القمر غايب
وراحتك في الضلوع خنجر
وطعمك في الخيال سكر
وعشقتك .. مس ربانى
امسه بروحي واتكسر
وتطلع مالركام صورة
رقيقة ريحتها كالعنبر
وتتفسر ..
بكل بساطة تتفسر
سنين السجن والمنفى
وجوه القلب لو عارفة
حروف اسمك بتتخفى
بروچ أحمر ..
وانا قاعد في سجنى ياعم
يزورنى الحلم شايل حلم
ويرحل هم سايب هم
وبستنظر .. ميعاد بكرة
يجينى بكرة متأخر!